

四庫全書

史部

欽定四庫全書

欽定外藩蒙古回部王公表傳卷之八十一

傳第六十五

青海厄魯特部總傳

青海厄魯特部在西寧邊外至

京師五千七十里東及北界甘肅西界西藏南界四川
衮延二千餘里即古西海郡地分左右二境左
境東自棟科爾廟西至洮賚河界八百餘里南自

博囉克克河北岸北至西拉塔拉界四百餘里
東南自拉喇山西北至額濟內河界四百餘里東
北自永昌縣界西南至布隆吉爾河界三千餘里
右境東自棟科爾廟西至噶斯池界二千五百餘
里南自漳臘嶺北至博囉克克河南岸千五百餘
里東南自達爾濟嶺西北至塞爾騰西爾噶拉金
界二千餘里東北自克騰庫特爾西南至穆魯烏
蘇河界千五百餘里厄魯特舊分四部曰和碩特

姓博爾濟吉特曰準噶爾曰杜爾伯特皆姓綽羅
斯曰土爾扈特姓不著部自為長號四衛拉特今
稱厄魯特即明時所謂阿魯台也有輝特者最微
初隸杜爾伯特後土爾扈特徙俄羅斯境輝特遂
為四衛拉特之一云青海蒙古分牧而處有和碩
特有土爾扈特準噶爾有輝特統以厄魯特稱
之和碩特設扎薩克二十有一其始祖為元太祖弟
哈布圖哈薩爾七傳至阿克薩噶勒泰子二長阿

魯克特穆爾今內扎薩克科爾沁扎賚特杜爾伯
特郭爾羅斯阿魯科爾沁四子部落茂明安烏喇
特八部其裔也次烏魯克特穆爾九傳至博貝密
爾咱稱衛拉特汗子哈尼諾顏洪果爾繼之有子
六長哈納克土謝圖次拜巴噶斯次昆都倫烏巴
什次圖魯拜琥次色稜哈坦巴圖爾次布雅鄂特
歡哈納克土謝圖為公中扎薩克台吉車凌納木
扎勒一旗祖拜巴噶斯子鄂齊爾圖汗及阿巴賴

諾顏牧西套後準噶爾滅其部詳阿拉善厄魯特
部總傳昆都倫烏巴什號都爾格齊諾顏今駐牧
珠勒都斯之和碩特部四旗其裔也圖魯拜琥號
顧實汗分青海部衆為二翼子十人領之居左翼
者曰達延曰鄂木布曰達蘭泰曰巴延阿布該阿
玉什居右翼者曰伊勒都齊曰多爾濟曰瑚嚕木
什曰桑噶爾扎曰衮布察琿曰達什巴圖爾達延
號鄂齊爾汗為扎薩克鎮國公噶爾丹達什輔國

公諾爾布朋素克車凌三旗祖別有附察哈爾之
和碩特亦其裔也鄂木布號車臣岱青為扎薩克
台吉羅卜藏察罕濟克濟扎布達瑪璘色布騰阿
喇布坦四旗祖達蘭泰為扎薩克郡王額爾德尼
額爾克托克托魯台吉車凌多爾濟二旗祖巴延
阿布該阿玉什號達賴烏巴什為扎薩克台吉扎
布一旗祖別有阿拉善厄魯特一旗亦其裔也伊
勒都齊為扎薩克親王察罕丹津輔國公阿喇布

坦扎木素台吉察罕喇布坦三旗祖多爾濟號達
賴巴圖爾為扎薩克貝勒朋素克旺扎勒達什車
凌台吉伊什多勒扎布三旗祖瑚魯木什號額爾
德尼岱青為扎薩克貝子丹巴台吉色布騰博碩
克圖二旗祖桑噶爾扎號伊勒登為扎薩克貝子
索諾木達什一旗祖衮布察琿無嗣達什巴圖爾
子羅卜藏丹津叛逃準噶爾後就擒宥之隸內蒙
古正黃旗顧實汗弟色稜哈坦巴圖爾號扎薩克

陀音為扎薩克台吉哈爾噶斯一旗祖布雅鄂特
歡三傳至阿布子二長達瓦次鄂爾奇達遜隸隸
噶爾號扈魯瑪台吉後來歸達瓦封公品級尋卒
鄂爾奇達遜授伯爵隸內蒙古正黃旗土爾扈特
設扎薩克四其始祖曰翁罕七傳至貝果鄂爾勒
克為扎薩克台吉索諾木喇布坦多爾濟色特爾
布木二旗祖別有舊土爾扈特部十旗新土爾扈
特部二旗亦其裔也貝果鄂爾勒克弟翁貴為

扎薩克台吉達爾扎丹忠二旗祖準噶爾設扎薩克二其始祖曰亭罕六傳至額森子二長博羅納哈勒為杜爾伯特所自始今駐牧烏蘭固木之杜爾伯特部十六旗自輝特二旗外皆其裔也次額斯墨特達爾漢諾顏為準噶爾所自始七傳至和多和沁號巴圖爾琿台吉駐牧阿爾台子十一曰車臣為其弟噶爾丹所殺曰卓特巴巴圖爾徙牧青海為扎薩克郡王色布騰扎勒再傳嗣絕曰班

達哩孫車木伯勒襲色布騰扎勒所遺扎薩克曰
卓哩克圖和碩齊為扎薩克輔國公阿喇布坦一
旗祖曰溫春子丹濟拉以來歸封扎薩克輔國公
附喀爾喀賽因諾顏部曰僧格子策妄阿喇布坦
號琿台吉再傳為其族達瓦齊所篡嗣絕曰噶爾
丹以掠喀爾喀為大軍所敗竄死曰布木號額爾
德尼台吉其曾孫即達瓦齊大軍平其部俘京師
尋釋之封親王不列藩部曰多爾濟扎布為喀爾

喀土謝圖汗察琿多爾濟所牋曰朋素克達什孫
噶爾藏多爾濟以來歸封綽囉斯汗尋叛為從子
扎納噶爾布所殺曰達爾瑪三傳至三濟扎布以
來歸授侍衛隸內蒙古正黃旗和多和沁弟曰墨
爾根岱青子二長丹津號噶爾瑪岱青和碩齊孫
阿喇布坦以來歸封扎薩克郡王附喀爾喀賽因
諾顏部次阿海三傳至達什達瓦嗣絕妻車臣哈
屯攜衆來歸編佐領置直隸承德府境不設扎薩

克輝特設扎薩克一其始祖曰納木占再傳至卓
哩克圖和碩齊為扎薩克輔國公貢格一旗祖厄
魯特諸扎薩克外設喀爾喀公中扎薩克一別有
察罕諾捫汗授扎薩克喇嘛轄四佐領自為一旗
不列諸扎薩克盟天聰初蒙古諸部內附厄魯特
猶私與明市

上以遠弗之禁崇德二年顧實汗遣使通貢閱歲乃至七
年偕達賴喇嘛等奉表貢八年

遣使存問達賴喇嘛以顧實汗擊敗唐古特藏巴汗

勅曰有敗道違法而行者聞爾已懲治之自古帝王致治
法教未嘗斷絕今遣使敦禮高賢爾其知之并賜爾甲
冑使未至顧實汗表請

發幣使延達賴喇嘛

允之順治二年顧實汗達賴巴圖爾貢馬至奏聞

天使召聖僧臣等自當遵奉三年以厄魯特台吉等入甘

肅境要糧賞

詔所司議勦撫會顧實汗奉表貢

賜甲冑弓矢命轄諸厄魯特嗣間歲輒遣使至厄魯特台
吉等附名以達和碩特族曰都爾格齊諾顏曰色
稜哈坦巴圖爾曰鄂齊爾汗曰鄂齊爾圖汗曰阿
巴賴諾顏曰達賴烏巴什諾顏曰伊拉古克三班
第達呼圖克圖曰額爾德尼琿台吉曰阿哩祿克
三陀音曰噶爾第巴台吉曰瑪賴台吉曰諾木齊
台吉曰綽克圖台吉土爾扈特族曰羅卜藏諾顏

曰楚琥爾岱青曰博第蘇克準噶爾族曰巴圖爾
琿台吉曰墨爾根岱青曰杜喇勒和碩齊曰楚琥
爾烏巴什曰羅卜藏呼圖克圖以顧實汗為之首
五年甘肅巡撫王世功奏青海蒙古駐西寧需索
供應請定貢使入關額餘駐關外給口糧

從之九年顧實汗尊達賴喇嘛入

覲先奉表

聞并貢駝馬方物十年

詔封遵文行義敏慧顧實汗

賜金冊印十三年顧實汗卒

上念其忠勤修貢

遣官致祭會青海屬復為邊患

諭顧實汗子車臣岱青及達賴巴圖爾等曰分疆別界向有定例邇來爾等率番衆掠內地抗官兵守臣奏報二十餘次屢諭不悛今特遣官赴甘肅西寧等處勘狀或爾等親至或遣宰桑來質誣妄之罪各有攸歸番衆等舊

納貢蒙古者聽爾轄倘係前明所屬應仍歸中國至漢人蒙古定界與市易隘口務宜詳加察核分定耕牧毋得越境妄行十五年復

諭車臣岱青曰前因爾等頻犯內地遣官往勘據奏爾等入邊向者取貢輒肆攘奪咎自難辭朕悉宥爾前愆但中外本無異視疆圉自有大防爾等向屬番取貢酌定人數路由正口遣頭目稟告守臣方准入邊至市易定所應從西寧鎮海堡川北洪水等口出入毋得任意取

道如或不悛國憲具在朕不爾貸也康熙四年甘肅提督張勇奏蒙古番衆游牧莊浪諸境情形叵測請增甘肅西寧駐防兵先是青海蒙古戀西喇塔拉水草饒乞駐牧張勇以其地為甘肅隘不容逼處往責之謝罪去因設永固營聯築八寨至是蒙古等復相繼徙近邊

上以漸不可啟

詔如張勇請五年勇復奏青海雖通西藏不過荒徼絕塞

朝廷曲示招徠准開市自應鈴東部落各安邊境乃
邇來蜂屯祁連山縱牧內地大草灘曾遣諭徙復
抗拒定羌廟官軍敗之猶不悛聲言糾衆分入河
州臨洮鞏昌西寧涼州諸地請設兵備

詔嚴防禦仍善撫以柔其心勇等乃自扁都口西水關至
嘉峪關固築邊牆六年川陝總督盧崇峻奏青海
諸頭目偵於八月將入寇因赴莊浪所備之遣總
兵孫思克屯南山隘相形勢固守達賴喇嘛尋檄

厄魯特諸台吉毋擾內地駐牧黃城兒大草灘蒙
古悉徙去獻駝馬牛羊服罪請撤駐防兵

允之十四年西寧諸鎮兵屯河東勦叛賊王輔臣青海蒙
古乘隙犯河西永固營副將陳達禦之陣歿孫思
克屯涼州宣示

朝廷恩威各引罪出塞會達賴喇嘛使至

命傳諭達賴巴圖爾等戰部衆勿為邊患十六年準噶爾
台吉噶爾丹襲殺駐牧西套之鄂齊爾圖汗青海

和碩特諸台吉懼挈盧幙數十避居大草灘撫遠
大將軍圖海等飭歸故巢十七年西套諸台吉偵
噶爾丹將侵青海遣使告和碩特台吉達賴巴圖
爾等為防禦計

上聞之

諭張勇曰噶爾丹侵青海如遠從達布素圖瀚海而往則
聽之若欲經大草灘則令堅立信約勿擾內地尋噶爾
丹以從者異志且距青海遠行十一日撤兵歸遺

書張勇詭稱其祖多克辛諾顏偕顧實汗取青海和碩特族獨據之欲往索以將軍所轄地故不果既而懼和碩特諸台吉襲已密遣使議婚以女布木妻博碩克圖濟農子根特爾張勇謀得狀奏噶爾丹讐青海蒙古議婚後恐復往侵甘肅當往來衝請增防

報可有巴圖爾額爾克濟農和囉理者巴延阿布該阿玉什子也駐牧西套以避噶爾丹侵乞假內地赴青

海

許之會噶爾丹屬額爾德尼和碩齊潛掠烏喇特戶畜青海
墨爾根台吉聞之遣使詰歸所掠喀爾喀台吉
畢瑪里吉哩諦亦以厄魯特掠所部陰偵之告額
爾德尼和碩齊和囉理及青海台吉茂濟喇克等
游牧額濟內河則未知其為何厄魯特也十八年

遣使

諭達賴巴圖爾等曰爾墨爾根台吉將被盜劫掠人察獲

解送朕甚嘉之夫勸善懲惡者國之法也邇聞厄魯特
衆棲處額濟內河爾達賴巴圖爾及墨爾根台吉其照
汝例嚴加治罪使至稱茂濟喇克和囉理皆無掠烏喇
特事額爾德尼和碩齊為準噶爾屬已徙牧去

詔檄噶爾丹收捕之不從二十九年大軍敗噶爾丹於烏
蘭布通青海諸台吉附達賴喇嘛表上

尊號

詔不允三十年甘肅提督孫思克奏噶爾丹巢距邊月餘從

子策安阿喇布坦雖交惡恐復合有侵青海舉道
必經嘉峪關外肅州密邇青海請設兵三千為備
從之三十二年昭武將軍郎坦奏青海諸台吉私與噶爾
丹通問請屯兵哈密絕往來踪

上以噶爾丹自烏蘭布通敗遁後乏邊警且青海諸台吉
素恭順

詔寢議噶爾丹尋屯牧巴顏烏蘭逼內汛
詔西寧設戍兵唐古特部第巴陰比噶爾丹詭為達賴喇

嘛奏稱青海諸台吉無異志請撤戍

諭曰此為征勦噶爾丹計非防青海諸台吉也會議勦噶

爾丹

詔檄青海衆勿驚懼三十五年

上親征噶爾丹敗之獲青海通噶爾丹使以博碩克圖濟
農及薩楚墨爾根台吉為所部長

遣使齎

勅諭曰爾青海厄魯特尊崇達賴喇嘛法教敬事本朝聘

問貢獻恭順有年朕亦頻加恩賚乃噶爾丹違達賴喇
嘛法教不遵朕旨朕統軍至圖拉勦而滅之博碩克圖
濟農等遣往噶爾丹使為朕所擒俱言達賴喇嘛脫縉
已久第已匿之且噶爾丹詭言青海諸台吉謀與彼同
犯中國今噶爾丹亡命西走青海諸台吉如欲仍前修
睦其各防邊界遇噶爾丹即行擒解若知而故縱此後
永讐絕之我使至察罕托羅海宣

諭善巴陵堪布蓋達賴喇嘛遣理青海蒙古務者也善巴

陵堪布名青海諸台吉集盟壇言曰噶爾丹殺鄂齊爾圖汗我等與仇但素奉達賴喇嘛言應遣議時達賴喇嘛示寂久唐古特達賴汗尋約和碩特八台吉遣使慶捷達賴汗即鄂齊爾圖汗子也世長唐古特鄂齊爾圖汗弟自衮布察琿無嗣外餘八人皆居青海故其裔稱和碩特八台吉三十六年二月

上視師寧夏

詔額駙阿喇布坦都統都思噶爾巴林台吉德木楚克西

寧喇嘛商南多爾濟等攜青海諸台吉使及賞物
往招撫之復以哈密達爾漢伯克額貝都拉內附
詔青海厄魯特勿擾哈密境三月阿喇布坦等至察罕托
羅海察罕諾捫汗迎告曰

皇上令青海衆得享安樂永受

恩澤何幸如之時顧實汗子惟達什巴圖爾存阿喇布坦
等宣

諭之達什巴圖爾議遣博碩克圖濟農及額爾德尼台吉

代八

觀阿喇布坦等語曰

皇上駕臨寧夏爾當率衆往朝毋自誤達什巴圖爾偕察罕諾捫汗善巴陵堪布及唐古特達賴汗子拉藏等檄諸台吉議約四月啟行達爾寺垂藏呼圖克圖溫都遜寺達賴綽爾濟喇嘛及囊素通事等咸請從私向使問獅象狀且相謂曰我等往朝殆必以所未見聞物相示閏三月阿喇布坦德木楚克

自青海歸議諸台吉至若露處未協朝典應令秋

後入

覲京師

詔如議

命都思噶爾商南多爾濟留駐鎮海堡俟之扈

蹕諸臣奏青海厄魯特與準噶爾同部聞噶爾丹敗竄咸

驚懼

皇上定策安集所部身至如歸誠非常舉請行慶賀禮

諭曰青海職貢有年來朝亦常事耳可勿賀諸臣固請因奉
表賀曰青海向雖修貢未隸臣屬今舉部歸誠噶
爾丹益無竄路

皇上安內攘外之心自此允愜矣四月

諭留糧騎及羊九千餘於達希圖海俟青海衆至給之十
一月達什巴圖爾偕諸台吉入

覲

諭曰朕非威懾爾等前來不過欲令天下生靈各得其所

朕何物不備朕之尊不在爾等來否所望爾等各遂安
全副朕好生至意耳

詔所從諸宰桑咸列坐預宴以

御用冠服朝珠

賜達什巴圖爾

賞諸台吉鞍馬銀幣有差復傳

諭曰爾等自祖父來歲修職貢故特優錫以寵爾歸十二

月

上大閱玉泉山達什巴圖爾等扈

駕往觀戰慄失色奏

天朝兵威若此何敵不克三十七年正月

詔封達什巴圖爾為和碩親王諸台吉授貝勒貝子公等
爵有差先是噶爾丹詭與青海姻實謀往侵懼大
軍討乃寢第巴以策妄阿喇布坦不附噶爾丹陰
間之偽為達賴喇嘛疏奏策妄阿喇布坦將侵青
海及唐古特

上斥其妄會噶爾丹使至

諭曰青海諸台吉奉貢久倘噶爾丹屬犯青海朕必往討之至是噶爾丹就滅策妄阿喇布坦憾達什巴圖爾等內附詭請大軍征青海討前助噶爾丹罪

諭曰青海諸台吉聞朕出師寧夏遠徙游牧嗣噶爾丹平定親來稱慶伊等並無過端豈肯遽為加兵朕統馭天下惟願宇內羣生成獲安堵豈有使爾等構釁之理二月

上幸五臺山

詔達什巴圖爾等從將

旋蹕

召覲行幄

溫諭遣歸給駝馬三十九年策妄阿喇布坦聲言兵擊第

巴遣使赴青海陰覘強弱

上以策妄阿喇布坦將不靖

詔廷臣留意漢趙充國所議五事為防禦計四十二年

上幸西安府達什巴圖爾等來朝扈

駕閱駐防兵奏禁卒精練天下無敵外省軍容復若是億

萬年可永享昇平

賜宴遣歸五十四年策妄阿喇布坦遣兵掠哈密

上以隣青海左翼牧

詔兵備之準噶爾敗遁初達賴汗子拉藏借青海諸台吉

定議內附尋襲唐古特汗以第巴私立偽達賴喇
嘛襲殺之而自立博克達之伊西扎穆蘇為達賴

喇嘛瑚畢勒罕青海貝勒察罕丹津等訐其偽奏
裏塘之噶爾藏嘉穆錯為真達賴喇嘛瑚畢勒罕
詔內閣學士拉都琥往驗尋

遣侍衛阿齊圖召青海兩翼議徙裏塘達賴喇嘛瑚畢勒
罕以弭爭端貝勒色布騰扎勒阿喇布坦鄂木布
朋素克旺扎勒台吉達顏索爾扎等僉請徙察罕
丹津不從將偕達什巴圖爾子羅卜藏丹津盟率
兵攻異已者阿齊圖疏至王大臣等奏察罕丹津

若先攻諸部色布騰扎勒等來奔應置邊內察罕
丹津牧距松潘僅四日程請備兵待

詔西寧四川松潘諸路設兵備之五十五年察罕丹津畏
罪徙裏塘達賴喇嘛珙畢勒罕至西寧宗喀巴寺
阿齊圖奏請集諸台吉定盟以羅卜藏丹津察罕
丹津達顏等領右翼額爾德尼額爾克托克托烏
阿喇布坦鄂木布等領左翼令永睦

允之會準噶爾由沙拉襲青海掠台吉羅卜藏丹濟卜等

牧畜復謀盜噶斯口官軍駝馬

諭曰準噶爾偵噶斯口兵勢稍弱潛來侵擾青海不可不嚴備之著西安兵會青海左翼四川督標兵會青海右翼協力防禦五十六年

遣使赴青海測分野未幾靖逆將軍富寧安謀策妄阿喇布坦遣兵赴唐古特馳疏

聞

上以裏塘達賴喇嘛畢勒罕事初定拉藏汗或陰導準

噶爾侵青海

詔理藩院尚書赫壽諭拉藏汗勿得與察罕丹津羅卜藏

丹津等構兵復

諭遣侍衛色楞等赴青海曰準噶爾若侵拉藏汗爾即與
青海台吉等定議協勦務令絕無猜忌不至滋變方善
或拉藏汗導準噶爾侵青海爾即諭察罕丹津等曰策
妄阿喇布坦屢抗大軍今拉藏汗與同謀是顯為讐敵
也聖主始終仁愛保護顧實汗子孫爾等正當奮志報

卷八十一
効而行尋察罕丹津等以準噶爾侵拉藏汗告

諭內大臣策旺諾爾布西安將軍額倫特等分屯青海要地五十七年拉藏汗乞援疏至

詔色楞等會青海王台吉議進兵察罕丹津謀拉藏汗被戕謀誘準噶爾至青海迎擊之準噶爾懼不至先是哈密伯克額貝都拉獻西吉木達里圖西喇郭勒地

詔設赤金靖逆二衛及柳溝所聽兵民耕牧五十八年

以其地錯青海左翼牧

遣官偕貝子阿喇布坦台吉阿爾薩蘭等勘定界阿喇布
坦等曰青海衆荷

恩厚何惜隙地可耕者聽給兵民留我等牧地足矣因集
所屬宰桑等畫地標識議勿私越時撫遠大將軍
固山貝子允禔統兵駐西寧請自索諾木至柴達
木路設站五站置青海兵十別令左右翼兵各三
百屯近軍地防準噶爾賊從之允禔復遵

旨集兩翼王台吉以

上意宣諭曰唐古特部達賴喇嘛班禪喇嘛法教原係爾
祖顧實汗所設今準噶爾戕拉藏汗離散耆衆爾
等前稱裏塘經堂勒藏嘉穆錯為真達賴喇嘛瑚畢
勒罕願置禪榻廣施法教今唐古特民人及阿木
島喇嘛如爾言

皇上為安藏計遣大兵送往唐古特爾等宜率所屬兵或
萬或五六十從往其定議具奏兩翼王台吉等僉

稱願聽

命五十九年所部兵從大軍敗準噶爾於卜克河齊諾郭

勒緯瑪喇等處因護達賴喇嘛入藏捷

聞

詔留兵二千屯青海偵防準噶爾雍正元年

諭曰自西陲用兵青海王以下台吉以上各著勞績

皇考曾降旨俟凱旋日計功今青海王台吉等歷年効績
應各酌加封賞其率兵進藏及駐防噶斯柴達木等衆

應令各處將軍分別加賞是年羅卜藏丹津叛

命大軍往討越歲而定羅卜藏丹津初襲其父達什巴圖爾親王爵從大軍入藏歸覲為唐古特長陰約策妄阿喇布坦援已復誘青海台吉等盟察罕托羅海令如所部故號不得復稱王貝勒貝子公等爵而自稱達賴琿台吉以統之郡王額爾德尼額爾克托克托噶不從偕鎮國公噶爾丹達什來奔上以和碩特族自相殘不忍遽加兵

詔撫遠大將軍貝子延信善慰額爾德尼額爾克托克托
爾時兵部左侍郎常壽駐西寧理青海務

命傳諭羅卜藏丹津罷兵不從則懲治之羅卜藏丹津詭
言親王察罕丹津郡王額爾德尼額爾克托克托
爾謀據唐古特諸台吉不服將率兵與決勝負蓋
以察罕丹津額爾德尼額爾克托克托爾首不附
已欲誣罪因脅諸台吉奉已如鄂齊爾汗駐唐古
特以遙制青海也察罕丹津為羅卜藏丹津所逼

繼額爾德尼額爾克托克托噶挈衆至

勅川陝總督年羹堯曰羅卜藏丹津自其祖顧實汗敬謹
恭順達什巴圖爾慕化來歸晉封親王復令其子羅卜
藏丹津襲封自宜仰體寵眷敬奉法紀乃妄逞強梁骨
肉相仇欺凌親王察罕丹津郡王額爾德尼額爾克托
克托噶等恣行倡亂朕甫聞其事遣使往諭令伊講和
修睦式好無尤乃肆意稱兵侵襲察罕丹津額爾德尼額
爾克托克托噶以致投入內境是其欲負朕恩悖逆天

常擾害生靈誅戮不可少緩朕欲大張天威特命爾為撫遠大將軍統領大兵往聲羅卜藏丹津罪如敢抗拒即行勦滅其黨有懼羅卜藏丹津勢暫為脅從者果悔罪來歸即行寬宥有能擒斬羅卜藏丹津者分別具奏有情急來歸者加意撫恤其不抗拒者無加殺戮羅卜

藏丹津詭罷兵誘常壽至察罕托羅海留之遣叛黨分掠西寧諸路煽賊番等為應副將軍阿喇納自吐魯番馳赴噶斯斷由穆魯烏蘇往藏路副將

王嵩叅將孫繼宗等擊賊黨於布隆吉爾及鎮海
堡申中堡北川新城等處四川提督岳鍾琪以雅
谷土司等兵勦歸德堡外上寺東策卜下寺東策
卜及南川口外郭密諸番復檄前鋒統領蘇丹等
協勦所至告捷羅卜藏丹津懼送常壽歸請罪

諭年羹堯曰伊乃深負國恩與大軍對敵之叛賊國法斷
不可宥不得因伊曾封王爵稍存疑慮其與羅卜藏丹
津同謀之王貝勒貝子公等既經背叛即宜削爵伊等

或來歸順或被擒獲不必更論封爵但視行事輕重可寬宥者從寬應治罪者治罪二年

詔以岳鍾琪為奮威將軍叅贊軍務鍾琪奉

命進勦偵從賊之巴爾珠爾阿喇布坦自烏蘭博爾克遁

尾擊之至伊克喀爾吉擒其黨阿喇布坦鄂木布

遣西寧總兵黃喜林由西爾哈羅色赴柴達木斷

噶斯路偵羅卜藏丹津走烏蘭穆和爾鍾琪復分

兵馳擊擒其母阿爾泰俘戶畜無算羅卜藏丹津

偕賊黨分道竄侍衛達爾等擒丹津琿台吉於華
海子阿布濟車臣台吉於布哈色布蘇吹喇克諾
木齊扎什敦多卜等於烏蘭克羅卜藏丹津走
準噶爾逆黨悉檻送

京師

詔行獻俘禮是役也以兵拒羅卜藏丹津者親王察罕丹
津郡王額爾德尼額爾克托克托爾也不從羅卜
藏丹津逆者郡王色布騰扎勒台吉阿喇布坦噶

爾丹岱青諾爾布巴爾珠爾察罕喇布坦旺舒克
喇布坦也為羅卜藏丹津脅從者貝勒朋素克旺
扎勒輔國公車校台吉諾爾布也始附羅卜藏丹
津尋以悔宥罪者貝勒羅卜藏察罕車校敦多布
貝子濟克濟扎布拉察布台吉袞布色布騰納罕
伊什也其附羅卜藏丹津者首惡曰吹喇克諾木
齊阿喇布坦鄂木布藏巴扎木從黨曰巴爾珠爾
阿喇布坦扎什敦多布格勒克阿喇布坦巴蘇泰

又察罕丹津從子塔爾寺喇嘛堪布諾捫汗也有
中甸者隸雲南麗江府羅卜藏丹津給偽劄令附
已大軍至率戶三千餘請降洮岷界外諸番舊為
青海屬悉就撫其不順者勦誅之阿岡多卜藏瑪
嘉鐵布納珠公寺朝天堂桌子山碁子山先密寺
興馬寺阿落西脫巴上篤爾素華藏上扎爾的諸
番衆以次底定青海患始靖

御製平定青海文立石太學

文曰我國家受

天眷命撫臨八極日月所照罔不臣順遐邇乂安兆人蒙
福乃有羅卜藏丹津者其先世顧實汗自國初稽首歸
命當時使臣建議畀以駐牧之地其居雜番羌密近甘
涼我

皇考聖祖仁皇帝睿慮深遠每厯於懷既

親御六師平定朔漠威靈所加青海部落達什巴圖爾等
震讐承命

聖祖仁皇帝因沛殊恩封為親王兄弟八人咸錫爵祿羈縻包容示以寬大而狼心梟性不可以德義化三十年來包藏異心朕紹登寶位優之錫賚榮其封號尚冀革心輯寧部衆而羅卜藏丹津昏謬狂悖同黨吹喇克諾木齊阿喇布坦鄂木布藏巴札木等實為元惡謂國家方宏浩蕩之恩不設嚴密之備誕敢首造逆謀迫脅番羌侵犯邊城反狀彰露用不可釋於天誅遂命川陝總督太保公年羹堯為撫遠大將軍聲罪致討以雍正元

年十月師始出塞自冬涉春屢破其衆凡同叛之部落
戈鋌所指應時摧敗招降數十萬衆又降其貝勒貝子
公台吉等二十餘人朕猶閔其愚蠢若悔禍思愆束手
來歸尚可全宥而怙惡不悛負險抗拒乃決翦滅之計
以方畧密付大將軍年羹堯調度軍謀簡稽將士用四
川提督岳鍾琪為奮威將軍於仲春初旬檣牙徂征分
途深入搗其窟穴電掃風馳搜剔巖阻賊徒倉皇糜潰
窮蹙失據羅卜藏丹津之母及謀逆渠魁悉就俘執擒

獲賊衆累萬牲畜軍械不可數計賊首逃遁我師逾險窮
追獲其輜重人口殆盡羅卜藏丹津子身易服竄匿荒
山殘喘待斃自二月八日至二十有二日僅旬有五日
軍士無久役之勞內地無轉輸之費克奏膚功永清西
徼三月之朔奏凱旋旅饒歌喧轟士衆訢喜四月十有
二日以倡逆之吹喇克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇六
師殄滅狂賊行間將士亦由感激

湛恩厚澤為朕踴躍用命斯役也芟夷凶悖綏靖番羌俾
烽燧永息中外人民胥享安阜實成

先志以懋有不績廷臣上言稽古典禮出征而受成於學所
以定兵謀也獻馘而釋奠於學所以告凱捷也宜刊諸
珉石揭於太學用昭示於無極遂為之銘曰天有雷霆
聖作弧矢輔仁而行威遠寧邇維此青海種類實繁錫

之茅土列在藩垣被我罷光位崇祿富負其阻遐禍心
潛構恭惟

聖祖慮遠智周瞻念荒服綏撫懷柔朔野既清四陲攸震
爵號渚加示之恩信如何兇狡造謀逆天鼓動昏慙寇
侵於邊惟彼有罪自干天罰桓桓虎貔用張九伐王師
即路冬雪初零日耀組練雷響輦鉦蠢茲不順敢逆戎
旅奮張螳臂以當齊斧止如山嶽疾如雨風我戰則克
賊壘其空彼昏終迷曾不悔戾當翦而滅斯焉決計厲

兵簡將往擣其巢踰歷嶽嶇坦若垌郊賊棄其家我繫
而獲牛馬谷量器仗山積蹇兔失窟何所逋逃枯魚游
釜假息煎熬師以順動神明所福旬日凱歸不疾而速
殪彼逆謀懸首藁街獻俘成禮金鼓調諧西域所瞻此
惟雄特天討既申羣酋惕息櫜戈偃革告成辟雍聲教
遐暨萬國來同惟我

聖祖親平大漠巍功煥文邁桓軼酌流光悠久視此銘辭
繼志述事念茲在茲王大臣等遵

旨議善後事宜奏青海王台吉等應論功罪定賞罰游牧地令各分界如內扎薩克例百戶置佐領一不及百戶者為半佐領以扎薩克領之設協理台吉及協領副協領叅領各一每叅領設佐領驍騎校各一歲會盟令奏選盟長勿私推貢期自明年始分三班九年一周自備馬駝由邊入京市易以四仲月集西寧四川邊外納喇薩喇地官兵督視有擅入邊牆者治又羅卜藏丹津之吹率桑及察罕丹

津從子丹東之宰桑色布騰達什等率衆降請各
授千百戶等官又喀爾喀居青海者勿復隸和碩
特族令別設扎薩克土爾扈特及準噶爾輝特如
之至西寧部衆凡陝西所屬甘州涼州莊浪西寧
河州四川所屬松潘打箭爐裏塘巴塘雲南所屬
中甸等處或為喇嘛耕地或納租青海但知有蒙
古不知有廳衛營伍諸官今番衆悉歸化應擇給
土司千百戶巡檢等職令附近道廳及衛所轄又

青海及巴爾喀木藏衛舊稱唐古特四大部顧
實汗侵據之以青海地廣可牧畜巴爾喀木糧富
令子孫游牧青海而巴爾喀木納其賦藏衛二地
舊給達賴喇嘛班禪喇嘛今以青海叛取其地應
令四川雲南諸官管理又達賴喇嘛遣人赴市打
箭爐駝裝經察木多乍雅裏塘巴塘向喇嘛等索
銀有差名曰鞍租至打箭爐納稅請飭達賴喇嘛
勿收鞍租打箭爐免取稅歲給達賴喇嘛茶五千

勛班禪喇嘛半之又西寧各寺喇嘛多者數千少者五六百易藏奸前羅卜藏丹津叛喇嘛率番衆抗大兵請於塔爾寺喇嘛選老成者三百給印照嗣後歲察二次廟舍不得過二百喇嘛多者三百少者十餘番民糧賦令地方官管理度各寺歲用給之又陝西邊外河州西寧蘭州中衛寧夏榆林莊浪甘州等處水草豐美林麓茂密蒙古諸部戀牧大草灘及昌寧湖請於西寧北川邊外上下白

塔等處自巴爾托海至扁都口築城堡令蒙古等
勿妄據又肅州西洮賚河常瑪爾鄂敦塔拉等處
應募民墾膏腴地庶漸致富饒至寧夏險要無過
阿拉善顧實汗裔舊游牧山後今或徙至山前請
令阿拉善扎薩克郡王額駙阿寶飭所屬歸阿拉
善後其山前營盤水長流水等處悉為內地又甘
州西寧界各設營汛令蒙古等不敢覬覦又巴爾
喀木等部來自羅隆宗東察木多乍雅外諸番目

悉給印照視內地土司例又青海屬左格諸番請
徙內地阿巴土司頭目墨丹住等從勦有功請給
安撫司銜不隸青海轄又西寧邊內可耕地請發
直隸山西山東河南陝西五省遣犯能種地者官
給牛具籽種三年後起科如例又甘州諸黃番應
招撫為青海藩籬青海諸部令各守牧地不得強
據妄掠商賈察罕諾捫汗喇嘛廟毋得私聚議事
遣官齎

敕往不論秩崇卑王公以下跪迎有背貳者必懲

上從其議三年

詔以博囉克克地給阿拉善郡王阿寶居之鈴青海族

屬越七載始撤歸詳阿拉善厄魯特部傳是年青

海和碩特土爾扈特準噶爾輝特喀爾喀及察罕

諾捫汗各設扎薩克鑄總理青海蒙古番子事務

關防

遣大臣齎鎮其地轄所部扎薩克岳鍾琪復奏親王察罕

丹津鎮國公拉察布等游牧河東地近河州松潘
各路前議市納喇薩喇之地狹恐不給蒙古需請
改市河州及松潘河州定於土門關附近雙城堡
松潘定於黃勝關之西河口二地並有城屋水草
美互市可久又郡王額爾德尼額爾克托克托爾
色布騰扎勒等游牧河西地近西寧請改市西寧
口外丹噶爾寺至蒙古歲資牲畜請每年六月後
聽不時貿易庶蒙古商衆獲利益

卷八十一
允之六年

敕準噶爾台吉噶爾丹策凌曰羅卜藏丹津無故弄兵殘虐骨肉朕遣大臣諭令息兵乃敢悖恩負德侵犯內境被我守邊輕兵擊敗遠竄爾父策妄阿喇布坦應即擒獻乃反隱為匿留是何意耶羅卜藏丹津乃不忠不孝之人爾父年高歷練尚能將伊酌處可以生之亦可以制之必不為所愚弄是以不曾勒令擒獻今爾年與彼相等羅卜藏丹津志氣乖戾不顧恩義斷不守分安居

甘處爾下爾務將羅卜藏丹津送至朕念達什巴圖爾
前績仍施恩養斷不將伊誅戮爾其祇遵朕命是年
唐古特部噶卜倫阿爾布巴隆布爾扎爾等叛
擾唐古特謀通準噶爾大軍誅之七年

上以準噶爾不靖必擾青海及唐古特因

決策遣討王大臣等議噶斯為準噶爾通青海及唐古特
要隘請選青海扎薩克兵千五百分屯噶斯及柴
達木得卜特爾察罕烏蘇諸路

允之會噶爾丹策凌遣使告將獻羅卜藏丹津聞大軍就
道懼乃攜歸八年

詔暫緩進兵

諭噶爾丹策凌速獻羅卜藏丹津當宥罪復

命青海扎薩克備兵游牧聽調準噶爾尋襲科舍圖汛
諭青海兵速赴噶斯準噶爾遁九年

遣二等侍衛殷扎納傳

諭左右翼扎薩克選兵萬屯青海適中地官兵皆賞裝復

命所部採買牲畜勿滋擾扎薩克公諾爾布拉察布等尋

徙牧叛

詔曰朕因準噶爾賊乘西路軍不備盜駝馬因念青海
各扎薩克人衆恐招逆賊侵害諭令派兵防護其採
買馬羊者原欲使伊等所有牧畜得變價值可獲利益
並非需此區區助也朕曾諭殷扎納一切派兵採買聽
蒙古便不可絲毫勉強并慮王台吉等科派所屬諭令
嚴行禁約豈肯令遣往人逼迫蒙古從事乎今拉察布

等無故他徙或殷扎納不能宣揚朕諭使衆心共曉而採買馬羊又不聽從其便以致拉察布等心懷疑畏暫避差徭特頒旨諭拉察布等令其速歸本處準噶爾賊或由喀喇沙爾前赴噶斯潛行騷擾或增人衆窺伺青海所部蒙古兵丁尚未齊集器械亦未周備難望捍禦賊鋒亦令官兵善為保護拉察布等不奉

命諸扎薩克擒獻復集兵七千為備軍械及馬不給

上憫之

諭廷臣曰朕所以聚此兵者特為保全伊等家口及游牧計非為征伐調遣用也今聞其生計情形朕心深為惻然候從容料理必有加恩之處所聚兵七千著選派三千照前所降恩旨官員賞給本年俸銀兵丁賞銀五兩至戍卒駐防日久資斧維艱著給茶幣等項及每月所食青稞遣歸兵四千名官員等著給三月俸銀兵丁等著給銀三兩各回游牧準噶爾賊或潛擾青海朕意欲將伊等預行從容遷徙令賊由遠路來一無所得不

待戰而力盡我官兵與賊交戰時青海三千兵但追襲賊後量力驅賊馬匹所得即賞之仍計馬匹多寡加恩議叙復

諭青海扎薩克等曰爾等係顧實汗子孫自爾祖宗以來依附內地邊疆恪順供職

聖祖仁皇帝視爾等如子孫撫育六十餘年寵遇優渥且念爾等尊崇黃教是以於達賴喇嘛班禪喇嘛等備極恩眷前羅卜藏丹津聽信流言敢行背叛我朝發兵征

勦逃竄準噶爾困苦恥辱無不聞之今爾等若至彼處
路途遙遠馬畜困斃彼豈能為爾等置立產業分給游
牧地各令率屬保聚乎況準噶爾終歲爭戰凡用兵必
置爾等於前虐使任意豈若各守祖父基業永享太平
之為得乎爾等若不熟計利害聽伊誑誘之詞依附賊
人妄思蠢動將來與師問罪必先及之

諭內附諸番衆曰爾等沿邊番衆及青海蒙古同受國家
撫綏之恩并無歧視今準噶爾賊窺伺邊境或將來侵

擾青海而蒙古之游牧黃河以南者畏避賊鋒投奔近
邊爾番族須留心照視勿因向有嫌怨乘其危急加以
戕害或蒙古恃衆劫掠爾等用力抵禦不可退縮俟事
定後朕自論其曲直分別賞罰番族蒙古皆朕赤子果
能遵朕諭旨彼此相安同受朝廷恩澤方為無窮之福
未幾準噶爾為喀爾喀所敗布偽書煽內附諸蒙

古復

諭青海扎薩克等曰青海王台吉等久荷隆恩冊封位號

褒寵顯榮迄今歷有年所至於編設旗分以便稽察賞
賚惟恐扎薩克等恃強凌弱互啟爭端譬厄魯特內有
得秦者有鄂拓克者有扎薩克勒者有得木齊者皆為
易於管轄人衆而已爾有飢饉朕必加之周給隨獵行兵
朕必加之賞賚從無徵輸爾蒙古者朝廷恩典至優極
渥若以封號旗分為賤亦可奏明酌改且爾阿巴賴諾
顏裔現在準噶爾所果為帥領乎抑為屬下乎準噶爾
係成吉斯汗臣僕爾等俱係成吉斯汗弟哈布圖哈薩

爾子孫若以博爾濟吉特氏之先論之準噶爾乃爾屬
隸奈何甘心自屈爾等當知準噶爾賊詭計勸諭屬人
分別利害亦令如喀爾喀奮勇立功豈可甘自懦怯朕
因準噶爾反間諄諄降旨爾等如能遵行則可保室家
游牧矣十年以喀爾喀敗準噶爾於克爾森齊老及額

爾德尼昭

諭青海扎薩克等曰喀爾喀奮勇勦賊爾等何獨不能各
宜鼓舞振興踴躍効命賊衆侵擾青海止有噶斯一路

爾等須防守隘口倘準噶爾前來務期協力追殺悉行
勦除十三年

詔撤駐防大軍所部仍選兵二千屯得卜特爾伊克柴達
木等汛以台吉達瑪璘色布騰色特爾布木領之
乾隆十一年辦理青海事務副都統衆佛保遵

旨宣

諭諸扎薩克歲防汛議以郡王額爾德尼額爾克托克
托爾之長子索諾木丹津及扎薩克台吉衮布喇

布坦色特爾布木多爾濟色布騰薩喇等防得卜
特爾汎以郡王袞楚克達什車凌喇布坦貝子丹
巴輔國公納木扎勒車凌扎薩克台吉達瑪璘色
布騰等防伊克柴達木汎十人為五班三年一察
軍械十二年以準噶爾使赴藏煎茶道噶斯復議
自伊克柴達木得卜特爾汎外設汎哈濟爾察罕烏
蘇二十年大軍征達瓦齊抵伊犁羅卜藏丹津就
擒

諭曰羅卜藏丹津負恩背叛逃往準噶爾偷生三十餘載今兩路大軍至伊無路奔竄仍就擒獲實足以彰國憲而快人心羅卜藏丹津俘至告祭

太廟

社稷行獻俘禮

上御午門樓受之以

世宗憲皇帝有羅卜藏丹津至仍有罪之

旨

詔免死子巴朗及察罕額布根授藍翎侍衛餘戚屬處
伊犁者

諭勿內徙二十三年大軍勦嗎哈沁偵沙拉斯瑪呼斯
賊竄呼爾塔克羅卜諾爾以地近噶斯通青海

詔副都統濟福赴西寧宣

諭所部集兵千為備復遣識噶斯道者偵賊踪既而所
部兵集扎噶蘇台

詔歸牧聽調勿遽就道濟福導

旨諭之請遣近牧者歸仍量留遠道兵屯烏圖備不虞
上鑒其誠

詔酌賞遣歸兵久之噶斯無賊踪乃撤烏圖兵還二十
四年陝甘總督楊應琚奏青海得卜特爾伊克柴
達木等處設汛屯兵為防準噶爾計今準噶爾及
回部悉底定請撤青海駐汛兵從之先是阿睦爾
撒納叛大軍分道進勦所部購馬二千駝四百送

巴里坤軍

詔予值斃者半至是復輸馬七百餘駝三百二十餘請
償斃數

詔仍如值給二十七年以所部諸扎薩克請給羅卜藏
丹津舊牧地楊應琚遵

旨往勘奏洮賚河等處係西寧肅州鎮標馬廠及番族
牧地不便撥給西喇郭勒及西爾噶拉金東西五
百餘里南北三十餘里地曠且距扎薩克等游牧
近請給其西爾噶拉金踰河即產礦山場久封禁

請飭扎薩克等就近守視

詔以西喇郭勒給之西爾噶拉金河東聽駐牧河西鉛
礦勿得越界私採所部扎薩克自察罕諾捫汗不
立傳外旗二十有九爵三十扎薩克多羅郡王三
一由親王降襲一由貝勒晉襲扎薩克多羅貝勒
二一由郡王降襲扎薩克固山貝子二一由輔國
公晉襲扎薩克輔國公四一由鎮國公降襲扎薩
克一等台吉十六一由貝勒降襲二由貝子降襲

一由輔國公降襲附固山貝子一公中扎薩克一
等台吉二

欽定外藩蒙古回部王公表傳卷之八十一

欽定四庫全書

欽定外藩蒙古回部王公表傳卷之八十二

傳第六十六

扎薩克和碩親王察罕丹津列傳

今襲多羅郡王

察罕丹津青海和碩特人姓博爾濟吉特號岱青
和碩齊元太祖弟哈布圖哈薩爾之二十二世孫
祖伊勒都齊為顧實汗第五子有子二長罕都再
傳嗣絕次博碩克圖濟農子四長岱青巴圖爾次

墨爾根諾顏次即察罕丹津次根特爾號車臣岱
青伊勒都齊裔設扎薩克三詳各傳博碩克圖濟
農初以噶爾丹女布木為子根特爾婦屢使通問
噶爾丹康熙三十五年

上親征噶爾丹獲其使羅壘額木齊及善巴於軍
詔羈羅壘額木齊於宏仁寺以善巴從我使齎

敕諭博碩克圖濟農等擒獻噶爾丹逆黨及根特爾妻已
而副都統阿南達設哨嘉峪關外擒其使之自噶

爾丹所歸者於素爾河曰阿勒達爾宰桑以

聞明年復

遣羅壘額木齊阿勒達爾宰桑等從我使往招博碩克圖
濟農及諸台吉來歸會河州副將李鳳翔遣使博
碩克圖濟農所以其私謂之曰爾為噶爾丹姻盍
說之降羅壘額木齊等歸收博碩克圖濟農喜謂其
子根特爾曰我使被擒謂戮之矣不意蒙

恩釋歸真

仁聖主也遣阿勒達爾宰桑等至將軍孫思克所稱願往
說噶爾丹降思克馳奏

諭曰此雖博碩克圖濟農欲圖報効但噶爾丹降與不降
豈係此遣使往說為也况朕已發大兵分路進勦博碩
克圖濟農使著遣歸尋青海諸台吉定盟內附達什巴
圖爾等入

覲博碩克圖濟農以疾不至唐古特部第巴疏請免觐根
特爾妻理藩院議噶爾丹罪甚重其女斷不可留

青海若博碩克圖濟農攜至或可

賜生全今反令第巴代請仍當檄取

上從之博碩克圖濟農尋卒子察罕丹津嗣奏噶爾丹女為
臣弟根特爾妻第巴疏請免解未蒙

允許但

聖主優眷顧實汗子姓乞以噶爾丹女仍給臣弟令完
聚

上鑒其情

諭免解未幾根特爾卒四十年察罕丹津來朝

詔封多羅貝勒五十六年偵準噶爾侵拉藏汗馳疏

聞議政大臣等請檄松潘西寧兵備邊

詔遣侍衛拉什偕察罕丹津定議明年察罕丹津奏大兵
將赴藏準噶爾必不敢潛至青海請仍撤松潘等
處兵入口牧馬休卒

上矐其言復

遣侍衛扎卜密

諭察罕丹津謀誘準噶爾兵時準噶爾賊五百謀侵察木
多察罕丹津詭遣宰桑迎赴裏塘都統法喇疑與
賊應劾其罪

詔傳諭察罕丹津所遣宰桑俟準噶爾賊至偕駐防裏塘
兵禦之察罕丹津尋來朝

諭曰人心疑懼之際爾能委身効順甚屬可嘉著晉封多
羅郡王歸牧請從大軍赴藏

詔撫遠大將軍固山貝子允禔善視察罕丹津且以兵護

其牧五十九年從平逆將軍延信護達賴喇嘛入藏雍正元年叙功

詔晉封和碩親王復

命轄其從子丹衷屬衆丹衷者根特爾子也初授輔國公以大軍自青海討準噶爾遣所部助獻糧餼復以兵從至藏

諭獎之晉封固山貝子尋卒無嗣

詔追封郡王遺奏獻部衆及牧地

上不忍納

諭曰丹衷實心効力身故嗣絕朕富有天下四海為家豈有利其所屬之理着四川提督岳鍾琪遣員會同扎薩克等察明戶口數目歸察罕丹津轄務使各得其所勿稍擾累至丹衷屬宰桑等素著勤勞亦著分別加賞先是議由裏塘遷達賴喇嘛瑚畢勒罕羅卜藏丹津違

命且煽察罕丹津盟謀興兵襲諸台吉察罕丹津有惑志

尋悔罪

詔察罕丹津及羅卜藏丹津領青海右翼察罕丹津牧河
東近松潘羅卜藏丹津牧河西近布隆吉爾地以
河為界是年羅卜藏丹津叛察罕丹津不之附將
搆難

上聞之

詔西寧松潘兵馳往援有拉察布者察罕丹津兄墨爾根
諾顏之子也附羅卜藏丹津以兵掠察罕丹津牧

察罕丹津攜孥及屬百餘奔至河州老鴉關外總理青海事務侍郎常壽置之河州邊內羅卜藏丹津復以兵掠河州界因徙孥蘭州察罕丹津屬額爾克扎爾瑚齊阿勒達爾和碩齊拉木布等以戶千餘丹衷宰桑噶隆色布騰達什等以戶七百餘相繼來歸三年

詔授扎薩克仍領所部歸青海牧以撫遠大將軍年羹堯不善撫其衆

飭責之牧甫定察罕丹津請入

覲

詔給整裝銀千兩明年將歸以行期

聞

名見圓明園

溫諭之復

賜銀千兩九年土爾扈特族諾爾布叛拉察布復為所

煽將由索羅木河竄察罕丹津聞變收拉察布牧

衆遣屬台吉等捕之或以察罕丹津偕拉察布徙
牧告

上知其內附誠不之疑拉察布尋就擒

諭曰拉察布雖係察罕丹津兄子朕知其素不相睦察罕
丹津効力有年今已老病仍奮志報効甚屬可嘉着賜
幣二十銀千兩令酌給所部効力人衆十三年卒子敦多
布旺扎勒先卒察罕丹津嗣絕

詔以拉察布子旺舒克襲

金史卷八十二
一次襲旺舒克察罕丹津從孫父拉察布有子三
長察罕喇布坦次旺舒克喇布坦皆別有傳旺舒
克其季也雍正十三年

詔襲察罕丹津所遺扎薩克和碩親王乾隆十四年卒子
旺丹多爾濟帕拉木襲

二次襲旺丹多爾濟帕拉木旺舒克子乾隆十四
年襲扎薩克和碩親王三十六年卒無嗣

諭曰旺丹多爾濟帕拉木所襲扎薩克和碩親王爵前因察

罕丹津無嗣以旺舒克襲之旺舒克故後朕復加恩
以旺丹多爾濟帕拉木襲今復無嗣此和碩親王爵
應即停襲但念察罕丹津誠心報効若竟絕祀朕心
深為不忍着加恩令旺丹多爾濟帕拉木胞伯父旺
舒克喇布坦之子納罕達爾濟降等襲授多羅郡王
管理察罕丹津所遺屬衆

三次襲納罕達爾濟旺丹多爾濟帕拉木從弟初
襲其父旺舒克喇布坦扎薩克一等台吉互見彼

傳乾隆三十六年

詔襲旺丹多爾濟帕拉木所遺扎薩克授多羅郡王四
十年郭羅克番掠青海牧戕扎薩克輔國公禮塔
爾納罕達爾濟追擊之俘賊番歸

諭獎四十七年

詔世襲罔替以承察罕丹津祀

多羅郡王策旺喇布坦列傳

後授扎薩克

策旺喇布坦青海和碩特人姓博爾濟吉特號達

賴岱青扎薩克親王察罕丹津從叔父其父多爾濟為顧實汗第六子有子三長畢魯咱納次薩楚墨爾根台吉次即策旺喇布坦多爾濟裔設扎薩克三詳各傳崇德七年多爾濟遣使哈喇扈濟等附達賴喇嘛表獻駝馬

賜幣及朝鮮貢物順治二年來朝三年復獻駝馬十四年表謝

賜其父顧實汗賻祭恩并奏稱西寧東向不設驛貢使往

來道艱乞設驛西寧東

上不允康熙十六年逆藩吳三桂為大軍所迫謀結青海
為援遣賊黨饋多爾濟金幣靖逆將軍張勇謀得
狀奏松潘茂州道通西寧恐吳逆乘間侵茶馬利
詔張勇屯甘州防禦多爾濟卒不助吳逆十九年

遣官駐松潘偵厄魯特邊情

詔撥多爾濟知之勿疑懼噶爾丹尋與喀爾喀構兵遣使乞
援青海多爾濟遵達賴喇嘛諭不之許三十六年

遣使招撫青海時多爾濟前卒策旺喇布坦代已久和碩
特八台吉集盟壇我使諭之曰達賴岱青當以身
入朝否則遣子弟代益以多爾濟子故重之策旺
喇布坦尋入

覲

優賚遣歸四十二年

詔封多羅郡王四十四年卒子額爾克巴爾珠爾襲

一次襲額爾克巴爾珠爾策旺喇布坦次子康熙

四十四年襲多羅郡王四十五年為諸昆弟所迫
自戕死子二長朋素克旺扎勒降襲多羅貝勒授
扎薩克次伊什多勒扎布別授扎薩克台吉自有
傳

二次襲朋素克旺扎勒額爾克巴爾珠爾長子康
熙四十六年襲多羅貝勒五十四年議由裏塘遷
達賴喇嘛瑚畢勒罕

遣諭所部朋素克旺扎勒稱聽

命察罕丹津不從將構釁久之事始定五十五年

詔選兵百屯噶斯路防準噶爾賊未幾準噶爾掠青海敗

遁復

詔大軍備西寧所部兵聽調六十一年

詔撤噶斯駐防軍仍備兵游牧雍正元年羅卜藏丹津叛

脅朋素克旺扎勒以兵掠郡王額爾德尼額爾克

托克托爾牧二年大軍至叛黨吹喇克諾木齊扎

什敦多布等遁噶斯朋素克旺扎勒擒吹喇克諾

木齊之宰桑都喇勒及扎什敦多布母乞降奮威將軍岳鍾琪令追勦吹喇克諾木齊果擒至

上以朋素克旺扎勒雖附賊尋悔罪

詔宥之仍留封爵三年

詔授扎薩克四年來朝

詔給整裝銀八百兩

諭曰朋素克旺扎勒之祖父皆封多羅郡王且於羅卜藏丹津叛逆時尚屬奮勉効力著仍晉封多羅郡王九年

詔偕額爾德尼額爾克托克托爾選兵萬護青海牧會其
從弟貝勒達什車稜附土爾扈特族諾爾布叛徙牧
圖古哩克朋素克旺扎勒以兵追歸檻獻

諭嘉之十三年卒其妻遣使告有子三長袞楚克達什次
達木垂次根敦皆幼且避痘不獲入

覲乞

恩令一子襲爵

詔以袞楚克達什襲

三次襲衮楚克達什朋素克旺扎勒長子雍正十三年襲扎薩克多羅郡王乾隆四十二年以病罷子索諾木多爾濟襲

四次襲索諾木多爾濟衮楚克達什次子乾隆四十二年襲扎薩克多羅郡王四十七年

詔世襲罔替

欽定外藩蒙古回部王公表傳卷之八十二

欽定四庫全書

欽定外藩蒙古回部王公表傳卷之八十三

傳第六十七

扎薩克多羅郡王色布騰扎勒列傳

今襲多羅貝勒

色布騰扎勒青海準噶爾人姓綽羅斯號車臣岱
青祖巴圖爾琿台吉父卓特巴巴圖爾準噶爾族
舊游牧阿爾台巴圖爾琿台吉死子僧格嗣為準
噶爾長卓特巴巴圖爾及其兄車臣以爭屬產故

與僧格隙刼殺之蓋皆僧格異母兄也噶爾丹為
僧格同母弟居唐古特習沙門法達賴喇嘛遣歸
轄準噶爾衆因執車臣戕之卓特巴巴圖爾自阿
爾台奔赴青海康熙三十六年大軍定噶爾丹亂
遣使招撫青海時卓特巴巴圖爾卒色布騰扎勒幼不獲
從和碩特諸台吉至四十二年來朝

詔封多羅貝勒五十四年議由裏塘遷達賴喇嘛畢勒

罕

遣諭所部色布騰扎勒稱聽

命且以察罕丹津異志告察罕丹津尋悔事始定雍正元年羅卜藏丹津叛脅準噶爾族附已色布騰扎勒將拒之懼不敵羅卜藏丹津強授兵令掠西寧色布騰扎勒不從陰遣使告二年聞大軍將至率戶口二千餘迎降署撫遠大將軍貝子延信置之西川口外復以導從逆之貝勒羅卜藏察罕輔國公車校台吉諾爾布等悔罪內附功

諭獎之晉封多羅郡王亂定歸牧王大臣等議青海之準

噶爾請勿令隸和碩特族

允之先是準噶爾族設扎薩克一曰阿喇布坦三年

詔增設扎薩克以色布騰扎勒領之尋入

覲

詔給整裝銀千兩明年卒子二長車凌喇布坦襲扎薩克次

車凌圖勒木為協理台吉

一次襲車凌喇布坦色布騰扎勒長子雍正九年

襲扎薩克多羅郡王乾隆十三年卒子索諾木多

爾濟襲

二次襲索諾木多爾濟車凌喇布坦子乾隆十三年襲扎薩克多羅郡王二十三年卒無嗣

詔以其叔父車凌圖勒木之子色布騰多爾濟襲

三次襲色布騰多爾濟索諾木多爾濟從弟乾隆二十三年襲扎薩克多羅郡王三十年卒無嗣色布騰扎勒喬自此絕

詔以其從祖車木伯勒襲

四次襲車木伯勒色布騰多爾濟從祖其祖班達
哩為巴圖爾琿台吉季子從兄卓特巴巴圖爾徙牧
青海子丹巴有子二長丹津早卒次即車木伯勒
乾隆三十年

詔襲色布騰多爾濟所遺扎薩克降授多羅貝勒三十
九年卒子垂忠扎布襲

五次襲垂忠扎布車木伯勒長子乾隆三十九年

襲扎薩克多羅貝勒四十七年

詔世襲罔替以承色布騰扎勒祀

多羅貝勒袞布列傳

今襲扎薩克多羅郡王

袞布青海和碩特人姓博爾濟吉特號阿齊巴圖爾扎薩克親王察罕丹津從叔父其父達蘭泰為顧實汗第三子達蘭泰裔設扎薩克二皆袞布嗣詳各傳袞布游牧嘉峪關外鄰哈密準噶爾及諸回使往來必經之順治十三年葉爾羌回長遣使

克拜挈衆三百入貢抵肅州哀布以葉爾羌嘗奪其屬將襲之甘肅巡撫周大煜徙貢使至甘州哀布挈千餘騎分道入聞官軍嚴備遁歸卒不敢為邊患康熙三十五年杜爾伯特台吉綽克圖避噶爾丹亂奔依衮布邊吏往詰以情告

詔勿究三十六年

上視師寧夏衮布遣宰桑禡木特至先是

遣使諭策妄阿喇布坦絕噶爾丹道經嘉峪關外衮布助

糧糗駝馬且為導令得達至是奏游牧邊外久不敢萌異志數年來青海諸台吉私盟皆未與請內附時額駙阿喇布坦等遵

旨招降青海行有期

詔攜袞布使往復

賜諭獎之阿喇布坦遣禡木特馳語袞布會袞布以建達賴喇嘛塔故遣長子額爾德尼額爾克托克托爾赴察罕托羅海中道聞達賴汗子拉藏將以兵襲

已懼歸衮布復遣次子朋素克往拉藏讓之曰爾父
私遣使內附非欲貳青海乎將興兵與爾父構難
朋素克馳歸語故衮布備兵待復遣禡木特迎告
我使曰若不先臨我地諸台吉疑自息阿喇布坦
等恐諸台吉不利之從禡木特言拉藏尋遣語衮
布曰爾獨希寵

天朝非所宜我將偕青海諸台吉內附因撤兵阿喇布坦
至諸台吉定盟衮布遣子朋素克入

觀

賜御用冠服視諸台吉有加禮三十六年

詔封朋素克為固山貝子尋卒無嗣停襲故不立傳四十

三年

上以袞布先諸台吉內附

詔封多羅貝勒四十四年卒子額爾德尼額爾克托克托

襲

一次襲額爾德尼額爾克托克托襲袞布長子康

熙四十四年襲多羅貝勒五十五年以議遷達賴喇嘛瑚畢勒罕事定

詔分領青海左翼五十九年送達賴喇嘛入藏雍正元年叙功晉封多羅郡王未幾羅卜藏丹津叛以兵四千掠其牧額爾德尼額爾克托克托噶拒之不敢所部多却走因攜妻問道至甘州乞援子阿喇布濟索諾木達什等集衆拒賊鏖戰七日賊始退率兵五百及戚屬千餘來歸署撫遠大將軍貝子延

信置之蘇油口內馳疏

聞

諭額爾德尼額爾克托克托曰青海台吉皆顧實汗嫡
孫自我朝

太宗文皇帝時顧實汗與達賴喇嘛恭順効力迄今百年
蒙

皇考施以恩寵加封名號普加庇護後經策妄阿喇布坦
敗壞黃教圍困西藏殺害拉藏且復謀侵爾等於是我

皇考遣發大兵偕爾等送達賴喇嘛至藏振興黃教今羅卜藏丹津無故稱兵以王等不入伊黨自相侵害朕仰體

皇考眷念顧實汗子孫之意其罪未明尚不忍即加征討已遣侍郎常壽往問羅卜藏丹津所行情事若能知罪悔過朕當定其是非和解爾衆仍令爾兄弟照舊安居如果羅卜藏丹津不遵朕旨侵犯邊塞豈可不遣兵征勦今王屬衆人等盡被劫掠窮困來自甘州朕聞之不

勝惻然特遣郎中通智分給廩餼牲畜令從豐厚王等
在彼安居不須憂慮朕斷不使爾等稍有拮据也常壽
奏至得羅卜藏丹津叛狀大軍討之亂始定三年
詔授扎薩克偕避亂來歸之親王察罕丹津各攜所部衆
歸牧撫遠大將軍年羹堯不優恤之

上責其罪曰朕聞郡王額爾德尼額爾克托克托屬部衆
窮困流離資生窘乏親王察罕丹津所屬雖稍能存活
亦屬貧窮爾身為撫遠大將軍理應酌量事勢緩急人

口多寡盡心籌畫分理乃僅發銀萬兩為賑濟用額爾
德尼額爾克托克托魯等遭叛賊掠奪投命來歸全賴
安置得所俾其衣食有資咸登樂利此諸部落人衆流離
失所豈萬金所能給耶額爾德尼額爾克托克托魯尋
入

覲

詔給整裝銀千兩歸牧

賜如之九年

詔領左右翼扎薩克兵萬護青海牧會土爾扈特族諾爾布叛額爾德尼額爾克托克托噶遣子阿喇布濟偕輝特台吉恭格以兵擊諾爾布就擒時和碩特族拉察布及達什車凌皆以叛徙牧諾爾布詭稱青海諸台吉謀逆阿喇布濟陰約以青海軍援已諭曰青海各台吉世受國恩斷無背逆之事親王察罕丹津聞拉察布叛即遣兵追捕郡王朋素克旺扎勒聞達什車凌叛即率兵攜歸額爾德尼額爾克托克托噶父

子効力行間阿喇布濟現偕恭格追擒諾爾布果有異志寧肯如此奮勉効力耶諾爾布械至訊之果辭誣論誅額爾德尼額爾克托克托爾尋奏年邁乞以子代從戎

上憫其情

諭曰額爾德尼額爾克托克托爾効力有年著將伊子內可襲王爵者指出一人朕加特恩封為長子額爾德尼額爾克托克托爾以索諾木丹津名奏

詔如所請乾隆十四年卒子四長阿喇布濟封輔國公以
非世爵不立傳次索諾木達什為協理台吉次即
索諾木丹津襲扎薩克郡王次車凌多爾濟別授
扎薩克台吉自有傳

二次襲索諾木丹津額爾德尼額爾克托克托爵
第三子雍正九年封長子乾隆十年扈

蹕木蘭行圍

命乾清門行走十四年襲扎薩克多羅郡王十五年

詔增得卜特爾及伊克柴達木汛兵以索諾木丹津領
之二十年大軍征達瓦齊索諾木丹津請備兵噶
斯路

允之達瓦齊就擒

詔撤歸二十三年

詔副都統濟福與議備兵偵防厄魯特逸賊三十六年
卒子衮楚克扎布封長子先索諾木丹津卒孫衮
楚克敦多布納木扎勒襲

三次襲衮楚克敦多布納木扎勒索諾木丹津孫
乾隆三十六年襲扎薩克多羅郡王四十年卒子

剛噶爾襲

四次襲剛噶爾衮楚克敦多布納木扎勒長子乾
隆四十年襲扎薩克多羅郡王四十七年

詔世襲罔替

欽定外藩蒙古回部王公表傳卷之八十三

欽定四庫全書

史部

欽定外藩蒙古回部王公表傳卷八十四

至九十

主事_臣陳若霖覆校

總校官編修_臣倉聖脉

欽定四庫全書

欽定外藩蒙古回部王公表傳卷之八十四

傳第六十八

多羅貝勒達顏列傳

後授扎薩克

達顏青海和碩特人姓博爾濟吉特郡王策旺喇

布坦從子父薩楚墨爾根台吉有子三長額爾克

諾顏早卒次即達顏次噶爾丹岱青諾爾布薩楚

墨爾根台吉嗣父多爾濟為青海右翼長康熙二

十九年我使赴策妄阿喇布坦所歸經嘉峪關為
青海台吉阿奇羅卜藏所掠甘肅提督孫思克誘
質其宰桑懼反我使遣兵擊之斬馘四百餘獲駝
馬牛羊千計阿奇羅卜藏遁思克檄青海台吉等
歸所掠薩楚墨爾根台吉遣宰桑詰阿奇羅卜藏
罪察獲畜械罄以獻復代謝罪

上以薩楚墨爾根台吉等恭順

詔宥之先是喀爾喀為噶爾丹所敗有阿海岱青班第者

奔青海依多爾濟久之子身歸戚屬百餘仍留青海薩楚墨爾根台吉育之三十二年

遣官往取悉遵

諭送歸三十五年大軍征噶爾丹唐古特部第巴煽薩楚墨爾根台吉以兵萬餘屯雜谷桑湯對河諸番地為觀望計謀噶爾丹敗遁歸尋卒子達顏嗣五十四年準噶爾侵哈密敗遁議撤噶斯駐防兵以達顏屬台吉等游牧柴達木通噶斯之察罕齊老圖

遣侍衛等駐其地偵準噶爾踪五十五年三月

詔選所部兵百屯噶斯閭三月以議遷達賴喇嘛瑚畢勒

罕事定

詔分領青海右翼先是親王達什巴圖爾為和碩特長以

私憾誣訐達顏罪

詔禁京師以其叔父策旺喇布坦代轄所屬尋策旺喇布

坦來朝乞宥達顏罪攜歸青海

允之有番族曰瞻對在鴉籠江西境其祖為喇瑪什喇扎

木禪明成化中入貢給之印再傳至多爾濟布木
子二長革松撒次按撒不相能革松撒子琳沁布
及孫側冷旺布屯牧瞻對按撒攜子側冷扎布徙
奔霍爾附青海說多爾濟以兵侵瞻對掠屬番二
千餘戶側冷旺布女弟之夫曰喇瑪布屯牧喇袞
與定謀內附納其土及民數瞻對屬番三千戶喇
袞屬番千戶且獻明所給印會策旺喇布坦遣宰
桑扎爾瑚齊等取霍爾賦使以私至打箭爐詭稱

多爾濟及子薩楚墨爾根孫達顏相繼征膽對賦
膽對久為青海屬請勿納我守汛臣遺書詰之策
旺喇布坦稱率桑辭誣且謝罪

詔授側冷旺布及喇瑪布官為內屬即隸泰寧協阜和營
之膽對喇衮二安撫司也策旺喇布坦卒妻額琳
沁旺布謀奪霍爾諸地達顏以策旺喇布坦恤育
恩弗爭也側冷扎布忌側冷旺布等內附攘附牧
地

遣官往勘知霍爾為達顏屬

飭額琳沁旺布給之復

諭達顏遣使霍爾察歸所攘瞻對地以宰桑等監之令番族勿滋擾達顏奉

命惟謹是年十二月來朝

諭曰達顏為達賴巴圖爾孫且素樸誠感戴朕恩實心効力辦理青海事務始終毫無舛誤朕甚嘉之著封多羅貝勒明年正月奏請增設噶斯兵防準噶爾

上聽其言二月扈

蹕幸畿甸

優賚遣歸五十七年卒

諭悼之子旺舒克喇布坦襲

一次襲旺舒克喇布坦達顏子康熙五十八年襲
多羅貝勒六十一年卒無嗣貝勒朋素克旺扎勒
為策旺喇布坦孫謀奪達顏屬

遣侍郎常壽勘狀達顏弟噶爾丹岱青諾爾布口吃達什

車凌其子也年十有四達顏妻王木楚木察罕達喇請以達什車凌襲旺舒克喇布坦爵

允之降襲固山貝子

詔善視達顏妻復

諭朋素克旺扎勒勿得私攘其屬

二次襲達什車凌旺舒克喇布坦從弟康熙六十年襲固山貝子其父噶爾丹岱青諾爾布初為閑散台吉雍正二年羅卜藏丹津叛脅之附不從

偕貝勒朋素克旺扎勒迎降大軍復以兵擊賊黨
吹喇克諾木齊等叙功

詔封固山貝子世襲罔替蓋青海世爵自此始噶爾丹岱
青諾爾布尋卒其妻請以達什車凌蕪襲之理藩
院議蒙古無襲兩世爵例

諭曰噶爾丹岱青諾爾布於青海羅卜藏丹津事著
有勞績因議叙封為貝子今既病歿伊兄弟兩家止有
貝子達什車凌一人著從優加恩并兩貝子爵為貝勒

仍世襲罔替三年

詔授扎薩克九年土爾扈特族諾爾布叛達什車凌為所
惑亦徙牧朋素克旺扎勒以兵追歸達什車凌奏
臣幼且多疾有墨爾根阿里克鄂木布者臣屬也
附諾爾布叛掠臺馬臣從臣母徙牧圖古哩克避
之告臣從兄朋素克旺扎勒擒墨爾根等歸乞

宥臣無知罪

諭曰達什車凌年幼以聽信讒言畏罪遷移並非有意逃

遁且值朋素克旺扎勒往追即迎前陳訴又將伊屬衆私掠汛馬者擒獻贖罪著從寬免黜多羅貝勒爵乾隆二十二年卒子丹巴車凌襲

三次襲丹巴車凌達什車凌長子乾隆二十二年襲扎薩克多羅貝勒三十九年卒子濟克默特伊什襲

四次襲濟克默特伊什丹巴車凌長子乾隆三十九年襲扎薩克多羅貝勒

多羅貝勒納木扎勒列傳

今襲扎薩克一等台吉

納木扎勒青海和碩特人姓博爾濟吉特親王察
罕丹津從弟祖鄂木布為顧實汗次子有子二長
墨爾根台吉次卓哩克圖岱青墨爾根台吉子七
長即納木扎勒次墨爾根岱青次車凌次特賴次
拉爾濟次額琳沁達什次阿拉布坦鄂木布裔設
扎薩克四詳各傳鄂木布號車臣岱青順治六年
以河西白帽回族米喇印丁國棟等謀逆助大軍

討之復招降西寧城

詔賜土謝圖巴圖爾岱青號鄂木布卒墨爾根台吉嗣

詔襲土謝圖岱青號其巴圖爾號弗之給也康熙十三年

以逆藩吳三桂叛

遣使往諭達賴喇嘛道西寧墨爾根台吉將尼之為我使
所叱懼謝罪嗣聞吳三桂煽王輔臣叛梗秦蜀以
所部兵屯大草灘外令軍書得達內地有準噶爾
台吉罕都及拜達者既降尋叛攜賊千餘掠番民

由大草灘毀邊垣遁墨爾根台吉聞之擊其衆以
大草灘饒水草來徙牧為守汛者所禦復乞屯牧
黃草灘

上不允

遣尚書科爾廓代往定界尋引去墨爾根台吉卒納木扎
勒自號額爾德尼三十五年奏請襲祖父號并求
黃草灘地

諭曰納木扎勒乞推祖父恩著仍以土謝圖岱青號賜之

至黃草灘既定為內地所請不允三十六年春

遣官招降青海納木扎勒從其叔祖達什巴圖爾入

覲

賜宴保和殿

召升陞飲以

御用冠服及銀幣

賜之三十七年

詔封多羅貝勒仍稱土謝圖岱青號四十一年以牧地乏

水草且多疾請徙牧大草灘

諭曰雖四十九旗蒙古未有令游牧內地者所請仍不
允四十九年納木扎勒卒子羅卜藏察罕襲

一次襲羅卜藏察罕納木扎勒次子康熙五十年
襲多羅貝勒雍正元年羅卜藏丹津叛羅卜藏察
罕附之偕逆黨阿喇布坦巴爾珠爾阿喇布坦等
擾青海牧二年聞大軍至悔罪率屬台吉衮布色
布騰納罕伊什等降其母復攜諸台吉妻請內徙

詔置西寧口外給茶麥諸物養之事定議附叛罪削多羅

貝勒三年

詔仍領游牧衆授扎薩克一等台吉六年來朝

上以能悔罪且奮勉稱職

詔晉封輔國公乾隆七年卒子多爾濟色布騰降襲一等

台吉

二次襲多爾濟色布騰羅卜藏察罕長子乾隆七年

襲扎薩克一等台吉二十六年卒子恭桑車凌襲

三次襲恭桑車凌多爾濟色布騰長子乾隆二十
六年襲扎薩克一等台吉四十七年

詔世襲罔替

欽定外藩蒙古回部王公表傳卷之八十四

欽定四庫全書

欽定外藩蒙古回部王公表傳卷之八十五

傳第六十九

固山貝子車凌敦多布列傳

後授扎薩克

車凌敦多布青海和碩特人姓博爾濟吉特扎薩克親王察罕丹津從弟曾祖瑚魯木什為顧實汗第七子有子四長根扎次哈坦巴圖爾皆再傳無嗣次達爾巴生噶爾車木伯勒子一即車凌敦多

布次東圖子二各授扎薩克詳後傳瑚魯木什號
額爾德尼岱青順治六年助大軍討河西逆回米
喇印丁國棟等復招降西寧城

詔賜巴圖爾額爾德尼岱青號康熙二十三年遣使貢方
物二十四年來朝會

上大閱於王家嶺奏請扈

駕往觀

允之歸牧謀噶爾丹侵喀爾喀以所部兵屯邊謀助大軍

討逆噶爾丹敗遁乃率兵還三十六年大軍定噶爾丹亂

遣使招撫青海瑚魯木什前卒子哈坦巴圖爾以疾不獲從諸台吉入

觀四十四年卒遺疏授親王達什巴圖爾稱子達什敦多布幼乞

賜恤蓋和碩特族八台吉以內附功授王貝勒貝子公等爵有差惟瑚魯木什及桑噶爾扎裔未

賜爵達什巴圖爾以

聞且獻哈坦巴圖爾疏

詔封達什敦多布為輔國公尋卒無嗣停襲故不立傳五

十七年以準噶爾襲藏

詔青海諸台吉往援時車凌敦多布幼而孤母楚克賚納

木扎爾以所屬唐古特兵萬請從軍五十九年大

軍分道入藏復助獻糧餽六十一年冬攜車凌敦

多布來朝

慰諭之雍正元年青海王貝勒貝子公台吉等皆以入藏功議加封賞獨車凌敦多布

旨賜多羅貝勒爵蓋異數也羅卜藏丹津叛車凌敦多布附之二年大軍將至其女兄從貝勒羅卜藏察罕母奔赴西寧楚克賚納木扎爾尋攜車凌敦多布及屬戶千餘請降

詔置伊克烏蘭和碩給茶麥諸物養之車凌敦多布從大軍勦羅卜藏丹津擒逆黨丹津以獻事定議附叛

罪削多羅貝勒爵降固山貝子乾隆二年卒無嗣
詔以其從祖秉圖之子丹巴襲

一次襲丹巴車凌敦多布再從叔父其父秉圖有
子二長色布騰博碩克圖授扎薩克台吉別有傳
次即丹巴乾隆三年

詔襲車凌敦多布所遺固山貝子尋授扎薩克十年扈
蹕木蘭行圍

命乾清門行走十七年卒子沙克都爾扎布襲

二次襲沙克都爾扎布丹巴長子乾隆十七年襲扎薩克固山貝子四十七年

詔世襲罔替四十八年卒子綽爾濟多爾濟襲

三次襲綽爾濟多爾濟沙克都爾扎布次子乾隆四十八年襲扎薩克固山貝子

扎薩克固山貝子索諾木達什列傳

今襲一等台吉

索諾木達什青海和碩特人姓博爾濟吉特扎薩克親王察罕丹津從弟祖桑噶爾扎為顧實汗第

八子生子塔薩博羅特號和碩齊子二長敦多布
達什次即索諾木達什崇德七年桑噶爾扎遣使
額爾伯赫等附達賴喇嘛表貢駝馬

賜幣及朝鮮貢物康熙三十六年青海諸台吉內附敦多
布達什及索諾木達什幼且避痘不獲入

觀四十四年親王達什巴圖爾奏諸昆弟子姓惟瑚嚕木
什及桑噶爾扎裔未

賜爵

詔封敦多布達什為輔國公五十九年以準噶爾潛兵據藏索諾木達什率所部駐柴達木敦多布達什復以兵護達賴喇嘛入藏雍正元年叙功敦多布達什晉封鎮國公未幾卒羅卜藏丹津叛以索諾木達什鄰牧誘擒之尋脫歸

諭曰索諾木達什竭誠報國盡忠効力今聞脫身來歸良慰朕懷特沛殊恩著封固山貝子給上等產業明年青海定

遣歸牧三年

詔授扎薩克入

覲

詔給整裝銀六百兩乾隆十四年卒子三長噶勒丹敦多克

先卒次噶勒丹旺扎勒次莽鴈相繼襲

一次襲噶勒丹旺扎勒索諾木達什次子乾隆十

四年襲扎薩克固山貝子十五年卒弟莽鴈襲

二次襲莽鴈索諾木達什第三子乾隆十五年襲

扎薩克固山貝子十八年卒子羅卜藏色布騰襲
三次襲羅卜藏色布騰莽噶長子乾隆十八年襲
扎薩克固山貝子三十一年以郭羅克番掠所部
牧畜逸走議不嚴防汎罪

詔削扎薩克以其弟巴勒濟特襲羅卜藏色布騰改授
閑散貝子爵互見彼傳

四次襲巴勒濟特莽噶第四子乾隆三十一年襲
扎薩克降授一等台吉四十七年

詔世襲罔替

附固山貝子羅卜藏色布騰列傳

羅卜藏色布騰初襲其父子莽萬所遺扎薩克互見彼傳乾隆三十一年議防汛不嚴罪

詔授其弟巴勒濟特為一等台吉代掌扎薩克而改授羅卜藏色布騰閒散貝子爵附巴勒濟特旗四十七年

詔世襲罔替

固山貝子羅卜藏達爾扎列傳

今襲扎薩克一等台吉

羅卜藏達爾扎青海和碩特人姓博爾濟吉特號車臣岱青貝勒納木扎勒從弟父卓哩克圖岱青為鄂木布次子康熙二十三年遣使達延宰桑貢駝馬尋卒三十六年和碩特諸台吉入

覲羅卜藏達爾扎幼不獲至母阿勒達爾以

聞

上憫其情

詔封輔國公五十年來朝晉封固山貝子

優賚遣歸尋授盟長六十一年率兵護達賴喇嘛入藏道

疾留郭莽廟尋卒子濟克濟扎布降襲輔國公

一次襲濟克濟扎布羅卜藏達爾扎長子康熙六

十一年襲輔國公雍正元年羅卜藏丹津叛兵脅

之因從擾青海諸台吉牧二年聞大軍至懼降事

定議附叛罪削爵三年

上以濟克濟扎布雖脅從尋悔罪

詔仍領游牧衆授扎薩克一等台吉乾隆二十年卒子車

凌多爾濟襲

二次襲車凌多爾濟濟克濟扎布長子乾隆二十年襲扎薩克一等台吉二十八年卒子達克巴納

木扎勒襲

三次襲達克巴納木扎勒車凌多爾濟長子乾隆二十九年襲扎薩克一等台吉四十四年卒子諾爾布璘沁襲

四次襲諾爾布璘沁達克巴納木扎勒長子乾隆
四十四年襲扎薩克一等台吉四十七年

詔世襲罔替

欽定外藩蒙古回部王公表傳卷之八十五